



Mis Guarani

**MAITEI OÚVAPE – INTRODUCCIÓN**

*Ñañembyaty hína ñamomba'e guasu haguã Ñandejárape, ñame'éségui ichupe ñande rekove. Tuicha mba'égui ñandéve guarã Ñandejára. Ha péicha niko añete.*

*Ñane rembiapokuéra tupao guáva ha avei jajapóva ñande rógape ha ñamba'apo hápe, ñande távape ha ñane retãme, opa umíva Ñandejára hína upe ñanembo katupyryva jajapo paite haguã iporã haguãicha.*

**ÑEMBO'E ÑEPYRÛ**

Tupã Ñandejára, nde pu'akapáva ha opa ára reikovéva, ehupytyka oreve rojapo haguã opaite ára ne rembipota marangatu ha roiko haguã ánga potĩ reheve ne rembijokuáiramo.

Nde Ra'y Hesukrístó rupive, Tupã Ñandejaraite, oikovéva ha ipu'akapáva nendive Espíritu Sánto ñemopeteĩme, yma, ko'ága ha opa araité.

**ÑAHENDU ÑANDEJÁRAPE – MOTIVACIÓN A LECTURAS.**

*Ñame'ë Ñandejárape upe imba'éva, ñamomba'e guasu ha ñahendu iñe'ë, jajapo ñanembo'éva Hesu, ha ñañeha'ã avei jajapópa hekópe ojerure háicha ñandéve léikuéra ha mburuvichakuéra ñane retã ha ñande távagua.*

*San Pablo oguerohory pe komunida Tesalónica guápe, ohechaukáva ijerovia tembiapópe ha ndopytáiva ñe'ëme añónte. Isaías katu he'i Ñandejára oisãmbyhyha mburuvicha guasu Ciro pe, ha'e ndoikuaáiramo jepe ichupe, Ñandejára hína upe omboguatáva hembiaapo.*

**LECTURA PETEĨHA:**

**KO'ÁGÄ ÑAHENDÚTA TUPÄ ÑANDEJÁRA ÑE'Ë ISAÍAS ARANDUKÁPE OĨ HÁICHA 45,1.4-6**

Péicha he'i Tupã Ñandejára hembiporavo Círope. Ipo akatúagui ichupe ogueraha.

Omoĩta ipo guýpe tetãnguéra, mburuvicha guasukuéra ku'a jokuaha ojoráta, táva

rokẽnguéra oipe'áta ichupe, ikatu'ỹ haguãicha avave omboty. Che rembiguái Jacob ha che rembiporavo Israel rehehápe, rohenói nde réra tee rupi ha romoingo va'ekue mburuvicha ramo, nde nda che kuaái ramo jepe.

Che hína opa mba'e Jára, ndaipóri ambue. Che ñoite hína Tupã, ndaipóri ambue. Che rombo'e va'ekue reñorairõ kuaa haguã, nde nda che kuaái ramo jepe.

Ojekuaa haguã opa rupi, kuarahy resẽ guive kuarahy reike peve, che ñoiteha, ndaiporiha ambue.

Che opa mba'e Jára, ndaipóri ambue.

**Tupã Ñandejára Ñe'ë.**

**Opavave:** Romomba'e guasu ndéve, Ñandejára.

**SALMO ÑEMBOHOVÁI 95, 1.3-5.7-10AC**  
**OPAVAVE: PEMOMBA'E GUASU ÑANDEJÁRAPE HA'E IPOKATU HA OMIMBIPÁGUI**

Pepurahéi Ñandejárape purahéi pyahu. To purahéi Ñandejárape opa ko yvy. Pemombe'u opa tetã rupi ha maymávape, ha'e tuichaha, ha umi mba'e hechapyrãva ojavóva. **O.**

Ñandejára tuicha hína, ichupe ñamomba'e guasu va'erã, ichugui jakyhyjeve va'erã opa Tupãgui. Umi mba'e tetã oguerékóva Tupã ramo, umíva ta'ãnga reínte. Ñandejára katu yvága apohare hína. **O.**

Pemomba'e guasu Ñandejárape opa tetãnguéra, pemomba'e guasu Ñandejárape ha'e ipokatu ha omimbipágui, pemomba'e guasu Ñandejárape héra tuichagui, itupao róga guýpe pemoguahẽ pene mba'e kuave'ë. **O.**

Pemomba'e guasu Ñandejárape ojehechaukáva heko marangátupe. Opa yvypóra henondépe toryryi. Toje'e opa tetã rupi: "Tupã Ñandejára ñande ruvicha guasu hína". Ha'e oisãmbyhy teko jojápe tetãnguéra. **O.**

## LECTURA MOKŌIHA: ÑAHENDÚTA TUPÄ ÑANDEJÁRA ÑE'Ë SAN PABLO OHAI VA'EKUE TESALÓNICA GUÁPE

1,1-5B

Pablo, Silvano ha Timoteo romomaitei Jesucrísto iglésia Tesalónica guápe, ojoajúva Tupä ñande Ru ha Jesucrísto Ñandejára rehe. Tupä Ñandejára tohykuavo ipytyvõ ha ipy'a guapy pende ári.

Opa araité rome'ëva ore aguyje Ñandejárape pende rehe, ha ore mandu'a pende rehe ore ñembo'épe.

Manterei ore mandu'a Ñandejára ñande Ru renondépe, mba'éichapa heta mba'e pejapo pende jerovia rupi, mba'éichapa pene mborayhu tuichagui hetápe peipytyvõ, ha mba'eichaite pevépa peha'arõ kuaa Ñandejára Jesucrístope.

Ore pehënguekuéra, ore niko roikuaa Ñandejára pende rayhuha ha pende poravo Hague.

Ako roikuaauka ypy ramo peëme marandu porã niko, nda ha'ëi va'ekue ñe'ëme añónte, heta mba'e hechapyrãme katu, ohechaukáva Tupä ha Espíritu Santo pokatu, ha roikuaa porãgui añeteha.

### Tupä Ñandejára Ñe'ë.

**Opavave:** Romomba'e guasu ndéve, Ñandejára.

## ALELUIA FLP 2,15-16

Aleluia.

Ijapytépekuéra pemimbi peë mbyja itáicha pyhare. Peñemohatã kena pe marandu oporomoingovéva rehe.

Upéicha, oúvo Cristo che py'a rory va'erã pende rehe, aikuaa pype nañani reíri ha namba'apo reíri Hague.

Aleluia.

## EVANGELIO

### MARANDU PORÃ ÑANDEJÁRA HESUKRÍSTO REHEGUA SAN MATEO OMOMBE'U HÁICHA

22,15-21

**OPAVAVE: ROMOMBA'E GUASU NDÉVE,  
ÑANDEJÁRA**

Peteĩ ára umi fariséokuéra oñembyaty ombopakova pire hağua Jesúspe

He'ikase chupe hikuái mba'e he'i'ỹ va'erãva, omõĩ vai hağua chupe. Omondo hikuái idisípulokuéra, ha umivandi umi Herodes rapykuéri oiko hatãva.

He'i chupe hikuái: — Mbo'ehára, roikuaa niko nandejapuiha. Hekoitépe niko eporombo'e Tupä rape. Roikuaa avei nerepenaiha umi mba'e nderehe oje'évare. Ha upéi ave, neremañái avavére rehecha hağua mba'eichaguápa ha'e.

Ore roikuaase mba'épa nde ere. Oĩ porã piko japaga impuéstó Césarpe, térãpa nahániri.

Jesús katu ohecha kuaa omoñuhãseha chupe hikuái. Osẽ he'i: — Peẽ tekove ahẽ, rova mokõi. Mba'éreiko pe che moñuhãse.

Pehechauka chéve pe níkel peme'ëva jepi. Ha ombohasa chupe hikuái peteĩ. Jesús omaña hese, ha oporandu chupekuéra: — Máva ra'anga ha máva réra piko ko oĩva hese.

Ha'ekuéra he'i chupe: — César.

Jesús he'i chupekuéra: — Néi, peme'ë Césarpe upe imba'éva, ha Tupãme upe imba'éva.

Ohendúvo upéva okirirĩmbaite. Oheja chupe, ha osẽ ohopa hikuái.

### Tupä Ñandejára Ñe'ë

**Opavave:** Romomba'e guasu ndéve, Ñandejára Hesukristo.

## JAJERURE ÑANDEJÁRAPE – PETICIONES

*He'i ñandéve Hesu: “Mokõi peñemoĩ ramo peteĩ ñe'ëme pejerurévo oimeraẽ mba'e che Ru yvágape oĩvape, ha'e ome'ë va'erã peëme”.*

*Jajerure katu upéicha ramo ñande Rúpe oñondive:*

### OPAVAVE: ORE RENDUMIKENA ÑANDEJÁRA.

1. Obispo, Pa'i ha Hermanakuéra rehe. Omoirũ haguã hapicha cristiano kuérape. Ojehe'a ha oguahëve haguã umi ha'eño, ikangyvéva ha oikotevéva rógape. **Rojerure ndéve Ñandejára.**

2. Jaguata haguã mburuvicha kuéra ykére, ñaipytyvõ ichupekuéra ojapo porã haguã hembiaapo, jaiko haguãicha tekojoja ha py'aguapýpe opavavete. **Rojerure ndéve Ñandejára.**

3. Sy ha túvakuéra rehe. Omboguata kuaa haguã oñondive hóga ha ifamília kuéra jerovia pópe. Oñopytyvõ haguã óga pýpe ha oñeha'ã haguã oiko py'a peteĩme. **Rojerure ndéve Ñandejára.**

4. Jajerure tou ñandéve ama porãite omboguéva ko séka puku, oñemitỹ haguã campesinokuéra. Ha avei ñañangareko haguã ñande rekoháre: ysyry ha ka'aguykuéra. **Rojerure ndéve Ñandejára.**

*- Ikatu ñambojoapyve ñane ñembo'e...  
Ñandejára ore ru, roju niko oñondive rojerure ndéve roikotevẽva, he'i haguéicha oréve nde ra'y Ñandejára Hesukrísto. Ehendumíkена py'a porãme ore ñembo'e. Amén.*

## **ÑEMBO'E OFREDA REHEGUA**

Tupã Ñandejára, roikuave'ẽ ndéve ko'ã temime'ẽ, peteĩ korasõ isãsóva ha imba'e porãva reheve, ikatu haguã ne remime'ẽ ore mopotĩ ko'ã techapyrã marangatu ko'ãga romomba'e guasúva rupi.

Ñandejára Hesukrísto rupive.

### **PREFACIO COMÚN IV**

**P.** Ñandejára toĩ penendive  
**O.** Ha nendive avei.

**P.** Ñamopu'ãkena ñañe ánga  
**O.** Romopu'ãma voi Ñandejára gotyo.

**P.** Jaaguyjeveme'ẽ Tupã Ñandejárape  
**O.** Iporã ha tekotevẽ.

Añetehápe iporã ha tekotevẽ, ha'e ore rembiaporã voínte ha ore pysyrõ roaguyjeveme'ẽ ndéve opa ára ha opa rupiete, Ñandejára, ore Ru marangatu,

Tupã nde pu'akapáva ha opa ára reikovéva.

Nereikotevẽi ramo jepe ore ñemomba'e guasúre, nde voi reme'ẽ oréve roaguyjeveme'ẽkuaa haguã ndéve.

Ikatu haguãicha, ko'ã ñemomba'e guasu roikuave'ẽva ndéve, ore pytyvõ roguatávo pysyrõ rapére Ñandejára Hesukristo rupi.

Upéva rehe, umi anhelkuéra opuraheíva ndive romomba'e guasu ndéve, ropurahéivo kyre'ỹme:

Imarangatu,  
Imarangatu, Imarangatu Ñandejára,  
Tupã Opa Mba'e Jára.  
Henyhẽ yvy ha yvága nde rekove mimbipágui.

Osánna yvágape.  
Jehovasapyre pe oúva Tupã Ñandejára rérape.  
Osánna yvágape.

## **ÑEMBO'E COMUNIÓN RIRE**

Ore Ru, rojerure ndéve, ko karu marangatu ta ore pytyvõ roipuru haguã hekopete umi mba'e porã ko yvy ape árigua ha tohupytyka oréve mba'e porã yvagapegua.

Ñandejára Hesukrísto rupive.

### **JAHAKUÉVO - DESPEDIDA.**

Ko ñande Iglésiape ningo ñaime Ñandejára kokuépe hína. Ko mundo tuichakue avei Ñandejára mba'epa.

Jahayhu ha ñañeha'ã niko ñamomorã ñande tupao. Jahayhu avei opa mba'e Ñandejára ohejáva ñandéve opárupi ete. Ha'e omba'apo ñanendive hína opaite mba'épe.

### **CON EL AVAL DE:**



Conferencia  
Episcopal Paraguaya



0981 615 628



@misaguarani



misaguaranipy@gmail.com